

簡松草堂詩集

簡松草堂詩集卷四

錢唐張雲璈仲雅

題孫新婦方氏傳後

孫秀才諱芬之配

翩翩郎伯神仙儔皎如明月清輝流碧玉才人比  
肩侶同時雙燕栖重樓筵開却扇妝成靚端重能  
教眾人敬琴閣初調夫壻心食廚早識嚴姑性華  
堂春暖生羅紈花開連理常同看朱顏那識有長  
恨白頭直欲如新歡俄來二豎欺纖質繡枕伶俜  
偏臥疾玉版曾無起病方銀丸久乏回生術曲房  
窈窕閒琵琶月夜冷閉文牕紗芳塵已見委紅粉

一現但比優曇花往事回頭多噩夢秦臺只見單  
飛鳳萬古空懸孫楚情終年長抱安仁痛簾櫳垂  
地風珊珊當時重續誰同寒輾轉難成合衣寢淒  
然涕淚紅闌干年年寂寞朝還暮未肯重教開勝  
路縱將織素換織縑當日新人已成故翰林太僕  
兩鉅公淋漓大筆何清雄

杭堇浦先生作傳  
陳句山先生作銘能將

淑德表塵世不使零落隨凡叢雖和本是閩中彥  
外人那得尋常見却從文字識芳型至今衆口皆  
生羨黃泉碧落誠渺茫臨邛道士來何方卽今弱  
骨自不朽未須比較同稠桑搜來蓋篋猶生歎寒

斷  
食棠梨歲華換應知慰盡夜臺心藥砧莫更柔腸

種蕉和高漸至

自和風雨種牕前小院沈沈綠作天此日更無人  
位置蕉迷合配海棠顛

蕉迷見清異錄

雨中

泥草空階一徑斜沈沈淮雨總無涯牕通薄潤生  
銀管幔卷微寒上玉叉逆鼻香飄叢桂樹斷腸紅  
泣小棠花雁行定帶瀟湘色知落遙天第幾家

晚坐同高漸至

瑟瑟秋寒氣尙微  
扇絀生計已全非  
愁心不逐衣裳改  
人跡都如木葉稀  
風急芭蕉當戶亂  
雨昏蝙蝠上堂飛  
無言只學跣趺坐  
靜看香痕逗夕扉

秋陰

寂寞悲秋一片心  
卷簾長覺氣陰陰  
風侵畫閣龍香冷  
雲擁寒空雁路沈  
紅葉乍飛人共瘦  
黃花初放酒相尋  
添衣獨倚清防坐  
只有啼螿伴苦吟

和蘄至秋夜

樓外秋風鐵騎過  
夜寒初重壓輕羅  
牕明簾額玲瓏見  
幔隱燈檠菜菔多  
萬戶殘蛩通朔氣  
幾家孤

淚灑天河怪來愁思如潮信日作空江浩蕩波

秋盡氣悲索居如蟄適當炊斷之際慨然  
賦詩二章兼呈梁氏昆季

短景磻聲節漸催薜蘿門徑掩蒿萊一身落拓雄心  
懶九日登臨倦眼開自昔黃金能壯氣可知白  
面本無才絮袍立盡西風晚雲壓寒空陣馬來  
壯不如人敢妒人靜來萬慮總難辛早時誰識烏  
衣貴中落難辭白屋貧秋桂名成翻浪跡青雲路  
遠感浮身城西只有同心侶還共年年拂劍塵

杭城火用昌黎和皇甫湜陸渾山火韻

融風七日天渾渾錢唐水竭六井源赤雲夾日金  
鳥吞祝融御空乘朱軒大地忽作秦宮燔不可嚮

邇如燎原猛勢排盪裂厚坤大聲拉雜喧海垠熒

惑走入天市垣

癸辛雜識揚州分野正值天市垣所以兩浙之地易市浩繁

吳

國燒徹張昭門紅光焰焰浮朝暎居人四出如驚

猿焦爛微命同魚鼈薰灼鳥路無翔鴟火中時見

號公奔元冥退舍回祿尊宋人佚馬騶魯園東西

駿駿徒實繁哭聲直上層霄喧聯臂不暇歌吹填

吳郡赤物如信旛彭城小兒衣絳禪驅使十萬無

膚臂焚徹大達通曲轅武夫赳赳腰帶鞬大吏洵

洶車無幡黑雲前導長竿帶鬱攸氣逼如炙膳列  
校嚴比將軍屯挈持餅罌兼瓦盆五石之瓠浮大  
樽呼聲一例無譟言水龍倒吸銀河翻欲撼天闕  
爲平反壯士奮怒大目暖波濤下注濡地根火珠  
作矢飛申孫倒投隕絕索絳跟力挽造化非天恩  
橫目搏頹哀元元三十六皇不手援祈庸除北何  
足論瓊瑛玉瓊貢帝閣雨露難洗瘡痕毫社一  
鳥招人魂謔謔出出愁訴冤吁嗟十室九不存燧  
人火食供饗殮於水爲牡如媾婚作災何意驚劉  
昆宋無忌向雲中蹲畢方一足凌風騫精衛誰復



償其怨汲水殃及北海鯤玉石不分延崑崙春秋  
出內用不昏何至不戢遂自焚鳳狂龍躁吾意煩  
安得冰柱赤手捫

舟過餘不溪望舊時寓樓有感

重簾小閣兩依稀一色紅牕月影微我是營巢舊  
時燕而今却在路旁飛

舟夜卽事

酒醒霜氣入孤篷欵乃歌聲子夜中一岸青山半  
隄月蘆花吹雪戍樓空

早行

出門雞未鳴遙天亘寒碧霜華飛月中有氣却無  
迹嚴風入肌膚重衣不能隔猶憶驅車時犯曉作  
旅客

爲汪秋御題閩人上官清指頭著色牡丹  
開元宮中一捻紅爪痕朶朶留天功畫師何從得  
此意指尖所到生春風穠豔初勻露華墜種來只  
許琉璃地透點檀心玉甲明紉塗紅暈羅紋膩花  
光奕奕蒸雲開鄂君繡被常成堆昔日只從瑤島  
見此時誰向朱闌栽明牕窈窕文紗綠寫出從人  
知品目呵凍頰將顏色調潑盡燕支還映肉當年

此技無能工畫法直掩前人蹤以心運手手運指  
烘染仍與毫端同徐熙落墨應教遜沒骨圖中誰  
並論花肥花瘦指不知按紙偏能得分寸高情貴  
氣無與儔姚黃魏紫皆風流圖成便覺垂手舞意  
到真如繞指柔帳底金盤盛綺繡香壓珠簾春雨  
透不須綵筆夢中傳國色長看照懷袖

三絃行

華堂棗棗燈枝豔雲母屏圍夜開宴紅裙窈窕出  
當筵不學琵琶半遮面銀絲約髻花阿那睂心低  
壓常州羅勝常道罷斂容坐幾回無語顰雙蛾從

教妙技人前出斜抱三絃承以膝義甲輕籠犀柱  
鳴哀絲緊扣鮫文密黃金釧重調丁丁嬌喉未吐  
先有情含宮嚙徵纔一試已覺座上無喧聲曼音  
宛轉愁難勝回風不動梁塵定分明私語昵深閨  
喁喁却被旁人聽意氣激烈繁絃中兒女忽變爲  
英雄紅牙纔聽歌柳岸鐵板直欲凌江東有時頓  
挫成嗚咽振響一飛絃欲絕繡幕驚翻燕子衣雕  
闌催舞桃花雪往事悲歡總合并能教百感同時  
生薄命佳人金谷怨豪家公子秦川行瀏灑沈鬱  
皆神妙更有餘音爲繚繞檀口傳來忠孝詞柔黃

彈盡興亡調偶然小歇唱未終纖纖手語皆玲瓏  
寶釵斜溜鬢雲綠粉汗半潤顚花紅玉除新月流  
輝漫瑟瑟簾波漾銀蒜回看四座悄無言臨風却  
有人長歎此日灣頭見小憐春花秋月供華年生  
來自得周郎顧不用時時悞拂絃直使當時善才  
服誰下纏頭綾一束不少秋孃爲妒妝頗聞詞客  
能抄曲螺卮澱澁鳧花浮潛蚪玉柱爭藏鈎白波  
調笑春夜短紅酥上頰凝嬌愁酒酣欲訴心中事  
筵弄猶聞出餘技但知水調慣愁人那識紅綃常  
寄淚曲終嗒歎心茫茫蝦蟇更促停瑤觴勸君莫

再歌金縷盡是蘇州刺史腸

春去

忽忽春去掩重門是處啼來蜀帝魂只有荼蘼花  
上雨尙留殘點記香痕

次韻梁諫菴無題四首兼以慰之

一錯休言鑄六州深情長覺易句留可能見面心  
猶惜誰道聞聲志已酬詞客卽今憐太瘦王孫從  
古擅多愁不知懷抱終何似應比孤桐欲感秋

不比佳人錦瑟旁生來嬌小似垂楊絲蘿自昔終  
求托花葉相看却對當已分離愁同杜牧定知別

夢感蘇嬈迴文此日應長憶織得流黃第幾張  
買愁詩在起長嗟紅袖懸知勝碧紗世事而今皆  
畫虎因緣幸喜不隨鴉寸心似蠟難消熱讒口如  
蜂欲鬧衙聞說隔街山樣遠玉簫哀怨總無涯  
古井誰能不起瀾懊儂歌裏欲追歡已知文弱難  
禁病莫更情多久廢餐輕薄衫痕凝淚重玲瓏心  
路貯愁寬勸君且漫彈離調玉軫鸞絃也易安

寄和梁溪韓景圖新柳原韻四首

輕暖輕寒二月時長隄催放柳千枝玉花未撲紅  
泥閣金穗初翻白苧旗塞北羌歌終有怨江南歸

恨已如絲腰支看意從誰識歲歲臨波影自知  
樓臺依約綺爲寮煙鎖東風十二橋叱撥紅輕嘶  
馬遠閒關黃淺坐鴛嬌陌頭人去縈歌扇天上船  
回拂畫橈欲管送迎渾未解幾番絲雨度花朝  
盈盈猶是去年同憶煞屯田賦曉風揚子波含前  
度碧秣陵花伴後庭紅攜來桃葉名先妬聽罷瑤  
枝曲已通此日封侯消息遠凝妝人瘦翠樓中

不肯分明露曉愁六朝金粉幾時留未容謝女先  
題句只有吳兒解蕩舟日上秋千絨作索風前腰  
帶玉成鉤韓郎偏愛香牋咏

韓致光有香  
牋咏柳詩

可許西



湖載酒遊

疊韻

吹面東風乍過時，春回又到綠楊枝。  
麴塵近拂螭頭舫，步障遙牽鴨脚旗。  
浪碧漸蒙煙冉冉，闌紅不隔雨絲絲。  
西冷十里香車路，除却蘇家總未知。  
輕寒側側度紗寮，知漏春光在幾橋。  
緩帶詞人多姓沈，埽看才子總名嬌。  
未容舊恨生隋苑，已有新愁上楚橈。  
怕向流金隄畔望，青絲走馬正連朝。  
娉婷誰識兩湖同，一岸輕煙一岸風。  
已有名花憐白白，可無新曲記紅紅。  
燕裁玉翦春聲小，鶯擲金

梭織路通欲挽長條無限思錯疑人在別離中  
濛籠深淺不藏愁乍染春痕未易留花外人行多  
似畫鏡中樓遠總如舟譜來玉管歌三疊澹入銀  
蟾月一鉤我是臨風張子野紅牙振觸昔時遊

題梁諫菴不暇嬾齋詩集

并序

諫菴與予爲中表之戚且年相若而一切磊落慷慨悲歌嘯傲之意又無弗與同然其初皆未知詩也曩同居京師子年甚稚諫菴少長于予竹馬嬉遊固不足述後諫菴隨其尊人冲泉兄遠守黔

南歷銅仁鎮遠思南遵義諸郡蠻煙瘴  
雨水陸萬里音問阻絕時予方抱疾若  
上不識作詩爲何事諫菴雖爲之予亦  
未之知也後數年諫菴歸自黔中又數  
年予亦從茗上遷于杭於是予始學爲  
詩諫菴去做居八九坊唱妍酬麗短童  
持牋往來駱驛於道者殆無虛日迄於  
今予學未成而諫菴則才情卓犖風生  
水涌沙起雷行有不可一世之概此天  
授非人力也甲午春彙其三十歲以前

所作詩四百餘首分爲六卷丐予數言  
其上爰敘次如左并繫長歌

梁生玉立七尺長詩意瀟灑開老蒼偶然縱筆出  
奇氣硬語十萬撐空腸狂搜險覓竟成癖短詠長  
歌動朝夕軒昂盡向紙上來峭絕天邊老風格有  
如蹠躐不受調寒沙大野瘦骨驕又如秦州舊戰  
士拔劍氣與秋雲高看君意氣多骯髒落墨錚錚  
無細響二十四則詩品中不貴纖穠貴豪放幼年  
曾居夜郎天黔山黔水路八千蠻程沙磧皆異料  
佳句往往弓衣傳歸來八載鄉園住牕雨簷風幾

回度漸教衆口有詩名只怪青衫尙如故我聞作  
詩窮乃工苦吟多出蝸廬中不愁肝腎事雕琢白  
首甘受塵埃封君今年少何婉變生來不作尋常  
燕奕葉黃金甲第高行人指點皆生羨胡爲局促  
戶牖閒吟耽思苦如等閒凌雲之賦獻未得却使  
章句凋朱顏君才自昔多磊落開卷令我神氣索  
由來詩裏有功名送君直上麒麟閣

楊鄧都殉難詩

楊明府夢槎無錫人乾隆丙子孝廉任  
四川鄧都令值金酋逆命調赴軍營監

製礮位屢有功癸巳六月大軍至木果  
木山夜半賊劫礮局遂擁公去環叩用  
礮之法公陽教之而陰詭其製反裂殪  
賊無算賊酋切齒剝公屍如泥事聞

詔贈兵備道 賜祭葬蔭一子如其官

木果山前陣雲赤紅衣大礮轟天坼金酋肉破飛  
滿空戰骨千年不能白楊侯手奉將軍令一擊能  
殲萬人命礮局驚傳製作精鐵騎雖行不敢橫賊  
冒萬死來急攻計劫礮局先劫公有公不患礮不  
工首崩厥角請命同公僞大笑欣相從教之樞紐

藏其中忽然反走軍無功奔馬倒蹴深谷窮狂蛟  
退入馮夷宮賊如落葉隨迅風快掃屯蟻巢爲空  
殘骸剩體不見蹤人血作雨漫天紅賊衆恥爲公  
所給露刃攢公骨俱碎萬點寒沙萬點燐定化陰  
兵成一隊 朝廷痛惜褒忠魂贈官賜葬蔭子孫  
賊雖恨公重公義鄴都嘖嘖名猶存以賊攻賊賊  
不知轉環計妙乃若斯君不見楊侯之心本鐵石  
楊侯之手真霹靂

梅東書屋叢竹

一片檀欒影能涵靜者心石臺人語響雕戶晚寒

深挾雨光初亂，捎煙翠欲沈。坐看牆角遠，還傍綠  
蘿陰。

題炙背圖

矮屋茅檐位置寬，黃絲乍放坐來安。莫嫌暖氣偏  
宜背，冷面于今炙也寒。

病懷

戍削衣衫冷乍侵，隔簾雲葉晝陰陰。飛來殘籜聲  
無準，看到黃花節已深。南國故人裘馬壯，西風消  
息雁魚沈。不知寂寞秋多少，澹盡空堂一片心。

白貓聯句



茲物族類繁天竺流派別仲雅論功獨兒同問名

虎舅錫夫菴吾家有白老馴擾久護惜仲雅脩脩

掉獅尾茸茸集狐腋夫菴底用擣花染乍看訝雪

積仲雅形殊瑋瑋品壓青驄色夫菴斂蹄藏藥

欄展膊傍茵席仲雅苔痕愛橫眠蝶影屢驚孽夫

菴幾曾翻茶鼎初未裂書籍仲雅繞膝每依人延

頸解迎客夫菴喚汁忽來前訴魚似求食仲雅豈

屑作狡獪漫欲思騰擲夫菴投骨下錦墩攜兒哺

瓦鬲仲雅穿籬遲歸期偃衾伴寒夕夫菴聽蛩夢

乍醒捕鼠勤率職仲雅畫地占有無探穴恣搏擊

夫菴 雙耳應添痕百錢詎易得 仲雅 據竈笑八種

轉經嗤俗識 夫菴 擬倩峨嵋畫原屬張搏癖 仲雅

昔稱玉狻猊身價庶相埒 夫菴

雞毛帚聯句用韓孟鬪雞韻

去穢必以鬣雞羽亦貯待聚時計箴縛 仲雅 束之

揚璀璨彩塗膏空作雄 諫菴 斷尾終遭殆貫縷膠相

黏 夫菴 纏竹柄賸在或短若犀塵 仲雅 或長若矛

斂如翼插矮瓶 諫菴 如旂植高壇試看影襪襪 夫

菴 還疑怒魄磊香絨飾逾鮮 仲雅 丹雘染頓改黃

兼黑毳黝 諫菴 青雜素氎繼結眊匪一朝 夫菴 索

價詎三倍毛傳皮不存

仲雅

羽析肉早醢其肋奚

足惜

諫菴

其蹠已充餒媿無拔警智

夫菴

翻受呼

朱紿占禽或屬酉

仲雅

趁市豈逢亥峨冠究焉逃

諫菴

烏衣有何罪稽顙手屢揮

夫菴

輒蔚塵難浼

紅菴漫炫目

仲雅

敝帚徒貪賄灰泉淨斐几

諫菴

埃垢祛墨海伴以拭觚布

夫菴

料理勤勿怠厥職

在埽除

仲雅

論功實嘉乃持久類禿節

諫菴

求新

綴輕綵櫻拂陋杜老

夫菴

柳葉笑顧凱齋中雅具

多

仲雅

適用先自隗事添短童約

諫菴

製仗良工

宰古傳雞毛筆茲物殊可採

夫菴

梅東之屋鬻於吳氏別求栖止不得感成

四章

南飛烏鵲竟無枝栖息憑誰問強移

杜詩強移栖  
息一枝安

蓬徑人猶憐蔣詡露車我欲效王尼此身原說長  
如客有地何從更立錐不定心情同落葉滿天風  
雨自支離

聞道街西甲第新路旁指點往來頻花扶繡閣神  
仙貴日麗雕甍檠戟春此日朱門都似海無人白  
屋肯言貧吾家長史偏多計敢笑牽船住水濱  
梅東橋外綠波肥十載人看舊板扉近市豈謀朝

夕利閉門誰識嘯歌非寄蝸有人應爲主社燕經  
春不敢飛世事卽今多聚散年年生計總相違

端居仰屋百憂生離色忽忽又合并

時將北上

廣廈已

無寒士分舊巢偏戀故人情漸教長物憐徒壁尙  
有殘書媿擁城但乞一椽容穩住版輿花下少逢  
迎

將之京師作

北風卷寒雲遊子心漸壯豈能生壯心只覺成孟  
浪前年塌翼歸田園幸無恙纔隔兩載餘又聽驪  
歌唱嗟我學荒落挾持竟何當空卷蹈白刃敢誇

一軍張況復賦性迂與世違趨嚮朱門富貴多碌  
碌鮮依傍雖云骨相窮未免筋骸放妻孥笑疎嬾  
焉得旁人諒茲將隨計吏圖史悲跌宕亦不自  
藏力亦不自量譬如求神仙涉想母乃妄年來更  
多病自顧何恨恨誰言年少人意氣皆倜儻行期  
日以迫已覺多別況屏當問行李却笑物無長慈  
親念征途白髮愁相向含悲出好語暗淚滋肝臟  
事固未可知先勞倚闔望所得視所失往往不相  
償高樓響飛鴻落日增悒悵舉頭望長安長安在

天上

正月十日偕兄北上

道遠親童僕囊空感弟兄三年循舊例一意戀虛  
名披帽寒風急開帆夕照明猶看對牀在倚坐說  
鄉情

阻風

春風挽行人入暮何顛狂行人挽不住祇令增悲  
傷雲陰匿西日欲下如彷徨作事與行路同一心  
茫茫富貴豈不戀不能忘故鄉

晚次嘉善

暝色孤舟欲斷腸試燈風急雨絲長鄉心已是難

留住又趁寒潮過魏塘

過清風溼有悼同年謝軒鑄

諱昌鑒今少司空金剛先

生子

玉樹何堪著土中文章遺恨落秋風  
存來華屋生應貴現比優曇事易空  
風貌人猶憐衛玠姓名我亦羨終童  
而今怕聽山陽笛長對茫茫逝水東

上元舟夜呈兄

風雨蕭條冷客身天涯令節共相親  
定知此夜鄉園裏一殘寒燈話旅人

大雪夜泊



浩浩長波不可行北風吹雁夜無聲川原欲沒平  
蕪淺天地初迴大舸橫激灑酒杯猶共醉闌珊燈  
事最關情衾綢如水新寒重添得羈愁萬斛生

山塘送別詞

吳姬送客唱玲瓏琥珀尊前樂句工留得雙螺多  
少恨朝朝紅槳倚東風

江邊旅思

愁水愁風思渺然孤篷七尺臥江天寒更泥酒難  
成醉病骨辭家始自憐客裏易彈司馬淚路旁誰  
問孝廉船彭城飄泊多相似回首鄉關已一千

京口阻淺

大船壓波波爲乾小船閣水半在灘往來南北不  
知數檣烏穩坐江風寒估帆落處如蝟集天涯同  
是行期急無端留滯不得行萬目含愁沙上立長  
篙撐拄排如林短篙戢戢試淺深千人同聲唱邪  
許聲聲唱入行人心日暮思鄉轉無語居人那識  
征途阻行路之難類如許何必風波始爲苦

邗關夜泊二首

大隄楊柳繫輕橈白舫紅燈夜寂寥一半歸心託  
江水淚痕彈與廣陵潮

邗溝往事說繁華酒盡離亭不見家分得女兒江  
上月夜深來照玉鉤斜

魚溝旅舍題壁

碌碌誰憐抱病身又攜行索上雙輪夢清只墮湖  
山月衣白難緇京國塵挾策情懷猶似舊渡河風  
色不知春年來慣踏長安路空媿重遊面目陳

臨城大雪苦寒因憶先大夫秦中有詩云  
吹盡邊庭一片沙欲將哀怨寫胡笳但求  
一榻眠安穩無復心情更憶家想見當日  
行役之苦敬次元韻二首

馬蹄和雪踏黃沙聲帶蕭蕭驛外笳此味年來空  
領畧人生何事易離家

使車當日暗邊沙清淚長教灑夜笳留得孤寒兩  
兄弟關山風雪又思家

騾夫行

騾夫養騾如養兒騾飢騾渴心自知常將人語向  
騾語等閒不肯鞭箠施日行百里程夜食兩斗豆  
人皆羨騾肥己尙嫌騾瘦以恩酬力求無苛用力  
不報今何多我願愛人如愛騾

苦水鋪今改甜水鋪

苦水鋪甜水鋪道旁之人何太苦馬上春深不見  
家惟有春風怒于虎黃塵卷地復上天馬行陷蹄  
力不前車中人不見車去但覺天地相爲旋行路  
之難竟如此人生何爲不知止從來名利苦爲甜  
苦水何妨作甜水

景州道中

景州城外月漫漫歷祿聲中強自安柳髮盡髡春  
色斷馬毛如蝟曉風寒已教卅載空心壯只是重  
遊怯路難昨夜慈親還入夢天涯惟有淚洶瀾

乙未春外舅大司馬楷公主校禮闈予例

不得與試索居寓齋有作二首

陡覺身從局外看，閉門忘却長安。  
消除熱念何妨，嬾束閣陳言，亦自寬。  
天上有星，仍歷歷，人間無路，總漫漫。  
分知落魄年來，慣比校，心情只一般。  
銀釭寂寂，小牕中，不比三條樺燭。  
紅此事，真如羊挂角，再來未免鳥驚弓。  
疎才藏得文章拙，薄命妝成骨相窮。  
只說桃花貪結子，先教零落五更風。

旅病

銀燭光中著影偏，病來消息向誰傳。  
香殘翡翠身，前夢淚滿琵琶客。  
裏絃愁色上，看人似醉寒情戀。

枕夜如年紅襟定有相思字只在東風柳絮邊

客懷雜詠十二首

春暖春寒欲暮時  
晝長庭院日遲遲  
獨憐蕉萃閒  
門客過盡東風總不知

好夢迷離却易闌  
衍波箋紙未曾看  
無端賺得蕭郎至  
不許宮中賦曉寒

少年壯氣欲銷磨  
落魄難爲擊節歌  
一片鄉心忘不得  
夜來拋淚入金波

茶香燭影伴浮身  
萬斛羈愁日日新  
但覺坐來長脈脈  
此心仍是不閒人

料峭東風瘦骨侵不禁天氣乍晴陰自家檢點春  
衣服始識紅閨冷暖心

游絲落絮兩依依牽惹情懷上客衣好語頻來雙  
燕子飛時莫更傷人飛

蹀躞紅輕寶馬驕大隄芳草綠裙腰鞭絲帽影心  
情改不敢臨風縮柳條

舍南舍北問芳華小院沈沈一徑斜誰識多情好  
顏色玉階閒煞海棠花

暮湖人去柳稔稔別意春情兩不堪一曲送君還  
自送寄將離恨到江南



竹木正全言全  
六橋三月滿風光  
白塔紅亭幾許長  
千樹桃花萬  
楊柳人生那得不思鄉

折花歸去護娉婷  
燈影紅香上膽瓶  
留得雨絲風  
片在伴人殘夢太零星

裘馬清狂日共催  
閉門人識是疎才  
莫嫌不稱長  
安客猶帶黃塵滿面來

雨後借王夔公龔純毅稽久之約之法源  
寺看花

天涯物候客心知  
又是長安春半時  
新柳濃于三  
日酒名花豔過六朝詩  
臨風寒意還如水  
滿鬢鄉

愁總似絲回首輒紅塵裏望江南歸計已嫌遲

長安送春同嵇約之

幾箇曹騰到牡丹斷煙零雨思漫漫少年一去頻  
回首獨客多情久倚闌日下文章金馬貴時禮部  
將放

浪看

書登科錄後

爭看鐵網拂珊瑚名姓傳來自藥珠雲級丹梯仙  
路遠可憐無地著凡夫

豐臺芍藥詞十首

暖風遲日不留寒  
潑眼韶光未許殘  
賺得玉人簾盡卷  
大家都倚畫闌干

葉葉重重簇絳紗  
生來端不染鉛華  
憐渠眼底嬌如許  
始信人閒沒骨花

羣芳譜芍藥一名沒骨花

百分明豔百分愁  
一半濃妝一半柔  
人在輕紅塵裏住  
春潮流夢到揚州

風流何惜彩雲空  
收取朱闌一色紅  
尙有荼蘼花事在  
年年商畧恨東風

面面濃妝取次知  
風前空憶合歡枝  
誰將一縷春愁細  
化作紅香十萬絲

取次妝合歡芳簇紅絲聚香絲皆芍藥名

璫枝團露出流霞驚蝶狂蜂感歲華消得金尊夢  
尾酒斷腸春色在天涯

惹得餘香上鬢絲幾番嬌舞總難持無人解踏春

風路只有三生杜牧之

黃涪翁詩云春風十里珠  
簾卷仿佛三生杜牧之紅

藥梢頭初繭粟揚州風物鬢成絲

浩態狂香莫浪看珊瑚生暖玉生寒不知國色誰

相並錯被人呼小牡丹

小牡丹亦芍藥別名

臨風多事惜芳菲昨夜南園雨正飛好是扶頭人  
未醒繡囊香重不勝衣

綠陰簾外晝遲遲別意春情兩自知我是江南未

歸客看花生怕看將離

後芍藥詞

予前作芍藥詞十章近得諸同人和什  
殊有穠秣在前之媿意所未盡復得十  
首自寓感觸不暇較工拙也

東風惻惻弄餘寒客裏春光欲見難不道黃塵燕  
市畔尙留國色與人看

碧闌干外露凝香蜂蝶飛來未是狂欲種花枝三  
十六留將一一並鴛鴦

瑤枝簇簇澹春風不染燕支態自工若使當時經

一捻也應看取十分紅

琉璃千葉彩雲低，怨入春紅意欲迷。  
憐殺夜來經雨後，向人含笑背人啼。

依依脈脈可憐春，欲贈將離別意新。  
幾度賣花聲裏坐，不知誰是斷腸人。

一片柔情玉立時，東風寫影露華滋。  
虹橋春色應無分，愁對屏山看折枝。

敢將輕薄對名花，憐惜應須隔絳紗。  
二十四番風過盡，年年把酒祝芳華。

小閣分香慰客情，淺紅深白鬪輕盈。  
牡丹早已薈

騰過看到餘容眼倍明

移入簾櫳影亦香輕陰作意護餘芳多情誰是題

詩客輒語能銷鐵石腸

元郝經為藥句云鐵石肝腸銷鑠盡都將輒語說手

神

零香賸粉一叢叢惆悵無言曉夢中莫更闌前怨  
芳信有人紅淚灑東風

出都門作呈諸同人

滿面塵沙滿面愁一肩聊復賦歸休青袍無地酬  
知己金勒何年說壯遊水驛山程人又遠雨鈴風  
鐸味如秋殷勤惜別知多少回首長安淚兩眸

河間重宿來時旅店用壁閒韻

滿店楊花繫客行  
長途陳跡笑浮生  
人逢失意偏多感  
境到重來便有情  
矮屋月斜燈半壁  
虛廊風定柝三更  
涼如水清無寐  
細數離愁酒獨傾

卽目

涼風散入馱鈴清  
馬上征衫白苧輕  
遙把玉鞭雲外指  
曉霞紅過鄭州城

途中感懷

急雨打征鞍  
行人六月寒  
一身憐去住  
兩地說平安  
寂寞垂鞭過  
殷勤折柳看  
低頭數心事  
豈爲道



途難

五載公車路團團磨跡陳客心憐病馬人世總勞  
薪歸計南飛急離情北望頻自將雙袂理空染

帝鄉塵

幾度長安住鄉愁撥不開少年多不賤我輩本無  
才絃管春風亂琴尊上客催如何佳麗地落魄又  
歸來

作客行吟久長途只自知柳風敲帽影花雨亂鞭  
絲別意憐人遠鄉心恨馬遲年年蘇季子金盡是  
歸期

德州卽古厭次東方曼倩故里也因作東

方先生歌

四十四萬言獨誦二十二歲書自頌九尺三寸身  
長飢二百四十錢何用齒編貝目懸珠先生待詔  
來公車文辭不遜高稱譽如斯之人自宜位不次  
而乃索米下比騶朱儒拔劍割肉歸遺細君朔來  
朔來自責無文賜酒一石肉百斤跂跂脈脈善緣  
壁守宮射覆輒賜帛舍人呼礬榻之百衝口率臆  
言如流不知其爲滑稽爲俳優跌宕一世巖廊遊  
狎戲萬乘無與侔狐兔比主父草芥視吾邱詎啁

歷司馬談笑輕夏侯他如公孫巖徐輩  
齒牙樹頰胲豈與勇捷廉信同其儔  
自從泰階陳符辟戟諫始向人閒露  
真面要知大節在修身先生於世原  
非玩不信但讀非有之論設客難吁  
嗟乎用之則爲虎不用亦非鼠雄才  
大畧如漢武猶令長與枚郭伍先生  
安得無隱語

雨投新嘉驛

瑁皦長途數往還空勞好夢說刀鏃  
新嘉驛外瀟瀟雨不爲行人洗舊顏

雨後

一雨飛埃淨蕭然風滿林  
乏雲山氣碎

北人呼雨後雲爲乏

雲  
黏道馬蹄沈

路泥溥謂之黏道

卓午開遙景微涼澹客

心僕夫前路指茆屋幾家陰

投暝

投暝荒村外風沙日易韜  
亂鴉團老木饒馬齧空槽  
酒冷香初減愁多氣不豪  
繩牀聊拂拭長使夢魂勞

簡松草堂詩集卷五

錢唐張雲璈仲雅

傷馬二首

飼馬馬易肥鞭馬馬易瘦鞭之一何薄飼之一何厚  
汗染紫游繩點點桃花透忘却背上瘡且戀棧中豆

老馬行路遲壯馬行路速只願馬蹄健不顧馬毛  
禿昔人尙求死馬骨今人竟懸生馬肉

下水船歌

扁舟放溜淮南路逝水千年向東注河公水伯識

鄉心急送歸程不教住船頭一鷗鷺項鳴船後兩  
撓魚尾露挽索何煩曲岸移容刀豈羨衡流渡輕  
似風前舞燕斜疾於洞口修蛇赴但看天地屢低  
昂不覺川原莽回互荒村野戍幾回過白塔紅亭  
不知數煙樹方從望裏看指點蒼茫首頻顧來船  
却喜風色便天際帆張十幅布君得順風我順流  
彼此平情莫相妒是時日色變微暮初三月上蛾  
眉吐消受篷牕晚飯香輕羅瑟瑟涼飈度我行落  
魄不快意得此便欲誇奇遇不妨人力假天功以  
順效順無煩訴忽從坎止得流行旁觀那復知其

故嗚呼旁觀那復知其故但願人生萬事類如此  
貪心敢觸皇天怒

江口

不盡臨流意驚濤日夜分峰尖平海日帆幅疊江  
雲帶郭千家出凌雲一磬聞遙看京口外煙樹正  
紛紛

渡江

紅槩年來幾問津木蘭船是木蘭身遠浮玉樹千  
秋恨近隔珠簾十里春桃葉卽今誰用楫楊花終  
古欲愁人離情不讓江潮滿回首煙波日日新

蓉湖離思

樓臺渺渺柳重重  
船尾龍山落遠峰  
紅淚有人歌芍藥  
綠波何處采芙蓉  
長教疎雨飄離恨  
自怯涼颺損舊容  
好趁湖中一雙鯉  
彩牋題徹露華濃

吳市

吳苑荒涼跡已陳  
王孫猶識舊時貧  
而今乞食俱無分  
莫作吹簫入市人

舟夜露坐達旦

大舸中流下  
天空夜氣清  
露沈千樹色  
月涌萬龍聲  
爲客心情改  
臨風世事輕  
披衣篷底坐  
涼絕欲



三更

唐栖道中

北馬南船倦客情  
此來雲樹識歸程  
閒量往事心空壯  
乍聽鄉音氣已平  
夾岸煙蘆喧鴨隊  
兩行風柳曳蟬聲  
如今浪跡翻容易  
自笑天邊一鳥輕

八月十日風雨竟夕  
秋氣倂人因憶都下  
一二親舊

露骨如山獨傲秋  
繁華事去水東流  
連宵雨冷銅龍澀  
卷地潮來白馬浮  
別意不隨千里雁  
壯心還上幾層樓  
素書長跪無由讀  
空憶皇城汗漫遊

次韻靳至秋夜雜詩十首

乍聽空階落葉遲五奴遙數是更差

五奴見宋史律歷志扇

紉改盡繁華事愁唱秋風白紵詞

挑來紅燼落銀釭獨夜懷人雁幾雙一枕蕤蕤殘  
夢冷暗蟲如雨泣西牕

宛轉清歌擊越甌酒邊人散怯深秋近來善病如  
金鑠瘦盡東陽沈隱侯

十二文牕閉象紗青衫零落墨痕斜玉釵觸迓閒  
愁亂自折空階白鶴花

九天風露徹煙衢戛竹參差水玉膚一夜秋聲涼

到骨十分悵悵是青奴

雨洗新秋八月中一年又是木犀風芳菲不逐秋  
容淡留得桃花扇底紅

庭下夾竹桃極盛

疎簾風細燭花凋離思歌殘月底簫此日浙江潮  
有信如何人意不如潮

不得都下消息

斗帳紅珠好夢藏枕函簷馬聽瑯璫銀屏自寫梧  
桐月又被風搖過畫廊

寂寞秋情小閣中瓶花香篆兩重重鞭絲帽影年  
來慣澹盡名心是曉鐘

新詩分得行波牋好句如花一例鮮猶憶聯吟消

永夜任他寒柝五更傳

昨歲斲至館予舍相與夜半覓句每漏下數十刻不止亦樂事也

斲至復成秋夜十章再疊前韻

荀北歸來歲月遲江雲燕樹共參差  
淚花零落春魂斷夢憶玲瓏唱別詞

瑟瑟風吹燄燄缸秋中月色自無雙  
金莖露重花房斂低近紅蠻小格牕

不論酒殘與茶甌豪氣燈前欲破秋  
莫道生涯蕭瑟甚紫毫紅硯總稱侯

生衣涼透怯蕉紗燭外雲屏一向斜  
抱得芙蓉秋

怨冷春來也有未開花

金粟天香散九衢坐來秋氣欲侵膚越瓷自注昌

明綠却被旁人喚酪奴

白香山句渴嘗一椀綠昌明注蜀茶名予嗜茗飲而

梁氏昆仲每笑之故戲及

夜深涼露滿庭中犀押簾高不受風留得雙鬟妝

點在女兒花綻一籬紅

梧桐百尺已先凋爽籟泠泠欲過簫莫向風前悲

逝水人閒儘有去來潮

沈沈香鴨閣中藏望斷江南月作璫二十五絃飛

雁盡不知清怨落空廊

秋人流離鑠簾中西風樓閣幾重重寒砧斷盡千家夢不比闍黎定後鐘

無限秋情落彩牋空教涉筆鬪輕鮮不堪尙有重陽雨愁聽潘郎七字傳

月令仲秋之月元鳥歸鴻雁來秋士當此感物候之遷移傷時序之搖落於人事聚散深有慨焉因作二詩以送迎之

呢喃如訴別愁深無復當時下上音青瑣不消芳樹怨紅絲空寄美人心飛花落翦聲初寂秋雨侵衣冷乍禁有約明年應莫負舊巢珍重畫梁陰

豈必謀生總稻梁暮雲無際又南翔心依代馬三  
秋戍身帶盧龍萬里霜明月自來瑤瑟怨浪花猶  
隔楚天涼一聲莫便驚寒早多少空閨玉漏長

題高靳至表弟詩草兼與論詩

飲酒不飲甜俗酒讀詩不讀細碎詩力追大雅自  
可到真氣振古常如斯自來詩人幾萬輩標格一  
一爭新奇大家閒世始一出口月光掩虹蜺垂文  
章不逐朽骨朽譬若古器存銘辭黃河落天瀉萬  
里沙石漂走無留遺紛紛餘子流派別尋源皆得  
分其支今人不見古人貌古人能作今人師古今

豈必定相及惟以真意爲追隨人心不同如其面  
詩格亦與分妍媸作詩本以言性情高下悉視聲  
爲宜性之所近有同異情之所動無參差蔑古自  
昔笑荒陋泥古豈遂忘譏嗤二十四品各有態善  
學貴在能秀推刻畫李白塑杜甫未免筆墨紛如  
癡高君能詩有本性落筆灑灑無瓊玕轉折如環  
氣更健琳瑯結響聲非雌春林鳥語出細靜康衢  
馬足無奔馳讀書好古有奇癖鍵戶未許旁人窺  
難字不肯遮眼過爬羅剔抉祛危疑點鬼之簿在  
必錄祭魚之獺何嫌私西崑無牋令人恨儉腹白



戰常遭髻露鈔雪纂少餘暇珊瑚木難皆奇貨昔  
君三載寓我屋脫畧形迹忘髣靡唱調日日出妍  
麗蠻牋十幅爭紛披綠紗泥牕曲房靜簾波風輒  
生文漪丁香花冷碧桃暖日高亂影階前移是時  
晝長坐無事南牕吟苦聲吾伊露花秋凝紫毫潤  
鸚鵡注水看隄麋詩成每喜黏素壁盈盈墨瀋光  
淋漓有時擊盞入清夜樂此能使心忘疲麝香沈  
沈蠟煙熱綠茗斟出千花甕長更答盡玉壺漏輕  
寒入戶低芳帷科頭時作橐駝坐狂吟快意舒肝  
脾浙矛炊劍試危語險韻如縛無支那平生落落

寡儕偶姓氏敢藉知音知芙蓉江邊有詩友文酒  
夙昔恣酣嬉吳君斧仙鮑子若洲尤絕世大氣磅

礴如鼎彝此閒二梁

諫菴

夫菴頗精銳健筆共樹靈姑

鉅看君一出勢更壯賈勇來奪詞壇旗卽今詩家  
多上將母乃以我爲偏裨世人避詩如避疾吹毛  
反欲求其疵縱有好事少卓識未免誤食來螾蟻  
願君力學追正始鏟削尖穎排澆醜塵羹土飯在  
所棄芻銀紙繒何能爲崇樓飛觀十萬仞要在築  
實培根基嗟我落魄不稱意耽吟空作寒筇吹徒  
令雕琢到肝腎欲入堂奧先樊籬名難招譽反得

毀自慙不學同視皮狂言無補君未信却恐此論  
還空持

夫菴往山左未及賦詩送別偶過自然室  
卽次其所寄舟泊十里亭作原韻奉懷

少年心緒共蹉跎獨對涼天感慨多楊柳已空秋  
色外芙蓉爭奈晚愁何帆飛江路兼旬遠笛憶陽  
關一曲過此日畫廊增寂寞尙留殘照映顏酡

九月二十日北關送兄後風雨有感用東  
坡辛丑十一月十九日旣與子由別於鄭  
州西門之外馬上賦詩一篇寄之韻

孤篷壓愁小且兀

皮口休句疑  
子小且兀

征帆急趁西風發

應知分袂卽天涯回首神情已索寞念兄如雁獨  
衝寒逸翮遙看雲際沒今年同兄遊薊門共把鄉  
心訴明月此時匹馬長安行萬斛羈愁空惻惻在  
家行路兩難安一樣艱辛較絲忽懷兄不遠咫尺  
閒入耳秋聲苦酸瑟卽今風雨不對牀却爲蠅頭  
戀微職

次韻梁諫菴秋日雜感四首

別風注雨暮秋時

後漢書南蠻傳注引書大傳  
作別風注雨今作淮雨疑誤

不

飲何妨強倒卮世事難蟲應未了生涯鳧鶴總堪

悲底須白屋人憎命敢道青雲路有期埽地焚香  
空復爾由來得喪兩難知

一劍風塵已懶磨詩狂消盡賸詩魔美人南國離  
愁滿公子秦川暇日多馬齒功名應自惜蛾眉謠  
詠任相訶卽今節序催人晚欲采黃花奈冷何

頭顱如此鎮相憐極目西風萬里天入世易拋攀  
樹淚幾人能乞賣文錢新愁已是成千疊舊事何  
堪憶十年華屋山邱零落盡無因澆酒徹窮泉

一代才華迥出羣與來拖屐每過君匣中看劍龍  
騰氣座上吟風樹拂雲此日麒麟空有援何人鶚

鵬最能文同時亦憶衝寒雁宿盡黃蘆傍水濱家  
時方北行夫菴亦往山左

寄懷吳斧仙二首卽次梁夫菴韻

一別何堪歲月深故人消息倍關心我猶獨鼓門

前瑟君自難爲市上琴夢去長風仙蝶杳斧仙方自粵東

歸夜來寒雨老龍吟劇憐咫尺如相避慙媿空山

有足音

山陰移櫂欲何之空向人閒說項斯淚盡窮途原

有數愁來碧海竟無時君時方悼亡煙波已負三秋約

風雨徒懸一室思綠茗紅香消不得幾行離恨篋

中詩

紅香雙角枕綠茗小蒲團君舊句也

書魏本紀後

曹家虎視欲吞劉四十年來帝業休忽漫當塗逢  
典午依然亡國是陳留

漢獻帝封陳留王曹奐亦封陳留王

重過留餘山居六首

猶識當時徑空山足響聞石梁留宿雨磴道轉寒  
雲松竹千重密藤蘿一色分莫嫌來路遠還未及  
斜曛

結屋懸崖上開門愛翠光山容如舊瘦人面比前  
蒼菊色寒逾好苔痕滑不妨登臨逢十月猶近古

重陽

靈境何年闢園基十畝宮人工培實地鬼斧削虛  
空綠映雙眉際寒攜兩袖中檐前霜果落無處覓  
猿公

嶺上雲猶在門前柳正斜自來多舊隱終古屬君

家

今爲陶氏莊故云

露檻緣秋蘚風湍淪乳茶我尋巖下

宿端欲臥煙霞

巖腹孤亭小飛泉裂石開聲繁爭雨急寒極逼風  
來大壑添應滿長松答易哀不教山骨露寸寸裏  
蒼苔



不盡流觀意

流觀山亭名

名湖景色全鳥飛明鏡裏人

立畫屏前遠色千重鵲秋痕一抹煙石闌桐葉在  
點筆憶當年

空院

人跡如空山落葉一尺厚重陰悶虛堂竹光冷而  
溜草蛩解依人幽韻砌閒逗長風從西來聲作萬  
馬驟肅氣日以深漸令驚物候風琴戛空簷泠泠  
寒玉漱黃花滯不開恐人笑其瘦惟餘蒼苔痕斑  
駁土花繡侵晨拓書牕端坐斂雙袖單羅薄于雪  
頗覺肌粟透幽獨傷好懷淒然念朋舊遙知素心

人哦聲出戶牖

徐孃歌 并序

山陰何綱文賈粵中聞南海閨秀徐叶英有詩名娶爲室綱文母復爲聘同里胡氏兩不知也何夫婦居粵十年舉二子偕歸山陰胡本豪家知何有婦欲退婚何母利其富遂逐叶英胡女來歸并逐其二子幼子旋以病死叶英被遣無所容邑有菩提菴住持尼卽何之叔母也往依之訓童蒙以自給後其弟夢山

自粵來訪憤其事欲鳴之官叶英不可  
日止苦何郎耳遂謀同歸粵叶英素善  
珞璵子之術因售其技以資行旅自山  
陰凡四閱月始至梁溪詩人吳斧仙見  
而心異之叩其由來自述甚悉并出其  
詩三卷有咏梅百絕皆自寓之作斧仙  
爲賦梅花落一篇贈之并郵書致子因  
撰長歌紀其事時乙未十月

珠江水暖生明珠徐家好女珠不如稱名早已動  
閨閣東海家聲南海居何郎年少來行賈芳字流

傳似非悞李氏黃花舊有詞鮑家香茗曾工賦赤  
繩兩姓聯朱陳花花葉葉生青春端重自同舉按  
婦風流豈學當壚人五羊城中度昏曉夫婦秦樓  
相窈窕紅火熏來銀葉香綠毛調就桐花烏聚首  
閨房近十年春花秋月同留連東風吹花芳信速  
蘭芽雙茁茁庭階前念君阿母江鄉遠怪煞征人竟  
忘返莫將恩愛曠晨昏嚙指應嫌歸計晚妾身猶  
未識姑嫜同君此日偕歸裝新人入室已成故重  
教洗手嘗羹湯東家有女豔城郭阿母爲求動媒  
妁忽地彈成陌上桑非關射得屏閒雀只因兩地

信音難好事翻成惡事看直教掌上新珠滿不許  
懷中舊璧完阿母無情苦相逼不愛當牕三日織  
嫁女尙復重錢刀食宿何妨計兩得從來雞狗說  
相將一朝被遣歸何方弱質亦自存氣骨強留肯  
逐顏低昂登堂別母還再拜阿母分明意稱快更  
將佳婦配佳兒莫令胡氏來齟齬含淚再向夫婿  
辭夫婿別裁連理枝新人未來舊人去中間寂寞  
君先知回身抱得雙兒哭小者牽衣大追逐昔日  
添成錦上花而今剗却心頭肉一身飄泊隨風牽  
骨肉遠隔南雲天入門歡娛有人羨出門哀怨無

人憐茅菴結構超塵域却使皈依悟空色同是君  
家薄命人相逢幸是曾相識青雀白鴿金玉輪流  
蘇蜀葉交紛綸箱簾六七取新婦道有爭看羅敷  
秦當時徐孀乍相見亦與新妝同婉變卽今比校  
百不如從來物鄙由人賤螺龕燈火光熒熒不比  
紅羅樺燭明禪堂鐘磬聲寂寂不比房櫳琴瑟鳴  
度繡賣文無一可暫向童蒙課勤惰不作青蓮說  
偈師來居絳帳談經坐何家更吼河東獅復育不  
顧他人兒破巢那許有完卵肯向總角憐其癡當  
年懷抱常相惜嬌慣由來怕呵斥忽看摘盡黃臺

瓜抱蔓應教路有擲大兒宛轉依枯禪幼兒零落  
歸黃泉兒身那復一錢值母命且作游絲懸樂事  
回頭幾寒暑鄉園望斷今何所從前至死不同歸  
卽今山石猶能語有弟有弟來遠方勞勞車馬江  
山長相逢到此令人恨連宵痛語摧肝腸欲訴奇  
冤事昭雪搖手未言已嗚咽尙有深恩愛惜心不  
將薄倖從人說稚兒弱弟相扶持五千路遠行程  
遲大歸自昔有所刺棄婦寧免遭人嗤星家妙義  
應無贖指尖排出知前定自識生來命不猶從教  
談與人閒聽幾生修得到梅花梅花身世同悲嗟

只向空山甘冷淡豈知零落隨天涯一卷新詩重  
把論不數迴文織方寸易惹孤臣惶恐愁難消逐  
客湘潭恨延陵寄我長歌詞一一敘次無留遺孤  
芳本是少人賞久與凡卉同離披我今讀詩心似  
醉古今恨事原同類眼前不是琵琶人莫教輕灑  
江州淚

殘燈

臥看幢幢影裹身燈枝如粟色如燐雨昏壞壁虛  
疑畫風颭空堂似有人遙柝不傳蟲斷久夜寒無  
際雁來頻枕函留照千家夢自笑重幃夢未真



初冬病中得都下諸同人札兼讀樞約之  
遊法源寺有感歸寓獨酌成詩見寄之作  
卽次來韻奉懷

江上征鴻萬里音無邊落木氣蕭森風塵伏枕關  
河遠天地驚寒歲月深緩帶莫忘前日事素書空  
識故人心長安裘馬應回首惆悵芳尊不共斟

古鏡篇爲醉白居士作

并序

鏡下豐而上鏡長五寸厚半寸頂有紐  
已剝落惟鼻尙存其背鑄天帝日明及  
和合等符籙左右列陰陽卦十二中有

照天天開照地地潔照人人壽照鬼鬼  
滅十六字有署金大定丙午造皆了了  
可識以鏡人則長短敲側隨光轉旋無  
定相云以之辟疫癘祓不祥多有奇驗  
君不見廣寒宮中月如練七寶流光瀉瑤殿八萬  
三千之戶修不圓化作青銅如百鍊何人妙手巧  
相鑄鑄就熒煌鏡一片好物終當歸護持深入泥  
沙不輕見一朝忽作奇貨居道旁瞥見雙眸眩下  
豐上銳形製異市人傳看皆奇羨菱花七出終尋  
常方矩圓規一時變天上猶留斧鑿痕人間不照

團樂面我聞六花百乳搖光品四靈五嶽留真形

服羌青蓋同清明尙方冊禮兼長生蒲桃海馬俊

貌輕雲龍花雀鸞鳳迎

以上皆漢唐鏡名

張皇古物已漸

滅空令所寶逾專城吁哉此鏡非此比縱有其質

無其名塊然至今獨長在細數甲子猶崢嶸杏葉

之銘擅奇奧得毋同此良工成

雲煙過眼錄趙德潤有杏葉鏡上有

銘云人有一口前牛無八角牛口走殊不可曉憶細考之乃丙午造三字此鏡亦丙午造故云

昔金源肆驅逐南渡君臣悲局促百寶千珍輦北

行萬里龍沙不能贖健兒馬後有遺玩長安市上

無留蓄大定之末淳熙中

大定丙午乃金世宗二十六年宋孝宗淳熙十

三北勝南強兩和睦寶氣能隨兵氣銷縱有奇珍  
意不屬要知此鏡在當時滄海渺然浮一粟翻因  
所棄得所全宛轉流入錢江曲錢唐好古有奇士  
太息摩挲眼非肉熒然古澤几按閒猶帶當年土  
花綠雖爲世寶非世用銀鏤金盤總非福心憐此  
物五百年爲歎滄桑何太速人之所毀天獨存茲  
意難教語流俗好事偏欲誇神靈奇字徒驚識符  
籙卽今光天化日中已令魑魅潛形伏神鬼虛無  
世所稀何用鏡作然犀燭惟看古意在人前雙袖  
承來那忍觸

將赴廣陵別梅東故居出北關有感呈送  
行諸親友

回首生涯已漸非，浮家汎宅事依稀。  
秋風燕作辭巢客，明月烏憐繞樹飛。  
天道十年還一變，人生薄願豈終違。  
邗溝漫說繁華地，長憶滄浪舊釣磯。

夜過梁溪嵇存之筵上贈老彈詞人沈建  
中

虛堂銀燭影潭潭，絃索初調酒未酣。  
拋却故園檀版恨，來聽白髮唱江南。

蕭瑟簷風雨似塵，三絃彈出一番新。  
青袍落拓逢

君地錯認何哉是舊人

無限鄉愁遣不開尊前心事已如灰十年消盡紅  
牙淚欲換江東鐵板來

揚州風物鬢絲侵客思初濃每不禁二十四橋歌  
舞地還應振觸舊時心

揚州

滿眼豪華六代情邗溝長占舊時名江淮險扼東  
南地煙井繁依內外城

揚州新城明太守石叢巷  
所築當時謂之內城外城

天遠秣陵秋有氣潮來瓜步夜無聲太平合憶開  
歌吹厭說當年北府兵

神仙花月久模糊十里珠簾總畫圖世上猶嗤隋  
煬帝我來先拜董江都隄邊柳色長深淺橋畔簫  
聲乍有無值得朝朝騎馬看

寶鞏玉鉤亭句今日  
卷簾天氣好不勞騎

馬看揚州

未應作賦尙稱蕪

題汪起堂雙柑斗酒圖

春光滿眼春不賤何人賞春識春面豪家不少桃  
李園只把金盤薦春宴先生胸次天然清愛此春  
色兼春聲閒關乍聽出花底柑酒已足娛遊情桃  
花無言柳初沐一點鶯梭破煙綠詩腸俗耳兩分  
明此際知君有振觸前擔詩書後挾琴輕便野服

忘華簪狹斜公子五陵客縱有其事非其心朝來  
雨濕金衣透選樹啼殘韻如溜兩部鼉聲亦鼓吹  
未免當時笑寒陋大隄踏徧皆紅埃鶯花世界常  
相催揚州有鶴騎不得看君傾盡花間醅

蜀岡看桂同王用之沈采堂二秀才

蜀岡樹影散繽紛叢桂巖前氣欲薰明月長臨干  
仞閣涼風高卷萬重雲插來自笑簪痕淺拈處先  
教鼻觀聞滿覺路傍金粟徧一尊秋色定平分  
湖西  
滿覺路桂花極盛

汎舟平山堂下二首



尋芳步屨徧園林望裏亭臺識淺深聯絡裝成千  
片錦繁華銷盡萬家金勝遊却愛看圖畫往蹟憑  
誰論古今留得神仙花月地鬢絲長愁冶春心  
涼篷打槳畫橋通四面垂楊一面風但覺笙歌在  
天上果然樓閣是空中酒依金谷浮新綠花放平  
泉膩落紅自笑題詩太振觸遊情鄉思苦難工

客舍聞鐘聲

蒲牢聲動暮雲深黯澹西風雁字沈絕似南屏山  
下路回頭多少望鄉心

嵇約之歸信不果却寄

前年臥病湖邊宅聞君獨作長安客去年挾策居

帝京與君同走長安陌長安豈盡宜他人不使吾

儕置一席我來有書本欲上成例分明勢爲格別

頭初罷考功移

唐書禮部侍郎親故移試考功謂之別頭後中書舍人高郢奏罷之

却免當時紅勒帛我方落魄打珣璣君亦憐予意

頻惜朝尋白塔每同車暮踏黃埃共拖屐夜深相

對未肯眠輒語狂言不須擇相逢如此令人快萬

斛羈愁暫時釋我辭南歸君尙留重把鄉心數疇

昔紛紛別緒不可排如飲惡酒平胸鬲當時看君

氣頗壯會見凌雲舒逸翮生來華屋無與倫甲第

黃金長奕奕相公之孫尚書兒富貴非君更誰適  
我歸閉門如顛當門外蒿萊徑長窄旁人笑之不  
我問我亦逢人厭其跡今年僦居來揚州花月時  
時等閒擲江南江北使人愁望斷雲中素書隔素  
書昨夜風吹來滿紙離情語如積知君久客難稱  
意眼不逢青反逢白從前我亦薄功名此日方能  
知寸尺如君家世尚如此何怪窮途遭促迫聞君  
首鼠說歸期獨數鄉程還脈脈君今盛年何婉孌  
懷抱何容歎窮厄悞身豈必皆儒冠努力詩書沐  
恩澤況君有職供晨昏未許思鄉心駱驛懷君不

敢祝君歸苦向停雲憶朝夕西風一夜江上寒夢  
醒重城雨聲劇

慰汪學正劍潭悼亡卽題其花魂詞後十  
首

廿四番風廿四橋舊煙餘粉總無聊可憐玉葬香  
埋後只有人閒恨不消

唱罷當年緩緩歌怕從陌上試春羅紫牙拍碎檀  
槽冷眼底斜尖喚奈何

葳蕤深院閉芳華枕畔潮痕寫淚花愁絕年年守  
紅死斷風吹冷玉鉤斜

誰把相思著意栽鏡中金翠自生哀定知月魄無  
顏色長護亭亭倩女來

夢繞銀河水不流紅牆消息隔經秋世間誰是多  
情物陳鳳潘魚枉自愁

自調新曲教鸞雛別鶴聲中恨有無料得泉臺心  
未死還將紅淚貯冰壺

傷別空憐杜牧之三生情味竟誰知而今生在春  
風路莫向揚州怨鬢絲

畫看牕小拓文紗芳草離離一徑斜埽盡落紅空  
有淚淚凝還長斷腸花

埽紅劍潭閣名

成佛生天事杳冥稠柔妙子久無靈輕風醒夢茶  
煙外閒展楞伽四卷經

樂天慰元九悼亡云人間此病治無藥惟有楞伽四

卷經

飄殘紅粉是紅塵誰譜蠻牋一曲新敲斷玉釵歌  
舊怨防他愁損織縑人

時劍潭已將續娶

玉鉤斜

芳草如裙玉骨秋錦帆當日記陪遊不知殿脚三  
千女可傷雷塘土一邱

喜嵇約之至自都下留宿寓齋

迎人雙屣出門纔已覺相逢笑口開杯酒潑殘鄉

夢去江湖流轉客心來病餘瘦骨涼風健中夜雄  
談急雨催我近自憐萍梗甚尙看烏帽抗黃埃

雨廳話舊聯句

數年舊事總迷茫約之小雨閒門氣候涼鐵馬傳

秋驚遠夢仲雅茶甌翻雪潤空腸人生離合常多

感約之天道陰晴不易量明日妙高臺上去仲雅

相攜猶及古重陽約之時擬遊金山

瓜洲阻風同約之

年來何處不途窮似此淹留萬事同酒面熱消風  
色外離心寒卷浪花中儘多壯語酬知己未肯吾

生付柁工一片孤城殘照黑亂鴉如葉舞長空

大風偕約之放船至金山

丈夫落魄輕萬事顛倒雄心出奇志久思破浪乘  
長風八極神遊任恣肆大風三日留江干乍看洪  
濤頗心悸忽然大笑絕冠纓其中會得天公意憐  
予狂態厭凡境涌現奇觀特相示中流白浪大如  
山浮動金焦若軒輊瓜洲却與浮玉近咫尺何難  
葦杭至而此不到空羈留恐逆天心棄天賜放船  
急命凌浩瀚童僕舟人皆愕視嵇君固是甯憐人  
平生遇奇每酷嗜坐聽瀕洞風濤聲頃刻輕身履



危地船頭在水尾在空帆不依梳向有墜開頭振  
柁不由人有如馬劣難驅使耳畔時來銅枕吟應  
有驪龍不安睡千年老蛟飽人肉饒視吾儕動希  
冀是時目眩心神遷彷彿虛無出靈異水如含笑  
面如玉菘菽明珠結長帔江童雙髻唇塗朱足踏  
寒潮作兒戲眼前恍惚疑有無要是神靈非禍祟  
沿緣傍山泊山足乍定心魂尙如醉拂衣登岸縱  
遊眺梵宇琳宮見鱗次層臺拾級躡空虛欲與諸  
天分位置裴公往蹟不可尋石洞苔封畏深闕玉  
帶山門憶勝遊萬古風流總堪識撐空寶蓋一七

層欲凭危闌反惴惴江心孰艱山爲搖豈有狂僧  
撼龍臂主客坐對不能語歷想來時景堪記有人  
問我何所恃却把鴻毛輕賦畀我語有人莫相怪  
百歲人生本如寄況我命薄才又疎造物懸知不  
我忌向來恃此每無恐至險何妨且嘗試惟教誦  
徹臨深言未免低頭色生媿

蘆花四首和梁夬菴

清秋澤國遠相連望斷蘆叢思渺然曉色濛濛霜  
有氣西風蕩蕩月無邊暎來蓼穗寒塘外埽盡沙  
痕曲岸前萬點白鷗栖不穩一時飛破雪中天

誰將卷葉動悲笳一片蒼蒼色正賒春岸河狔纔  
往日秋風沙雁又天涯遠連白浪浮漁艇淡寫青  
帘出酒家多少人情知冷暖年年慙對木棉花  
村邊落木已聲乾一例蕭疎忍共看夔府詩懷秋  
渺渺潯陽離恨夜漫漫斷篷等是飛來易古渡應  
知問處難生在芙蓉江上路不同紅豔只同寒  
水蒨花事久蕭條看到蒙茸倍寂寥歸雁一聲迷  
舊戍斜陽千里送寒潮吟情早已催黃葉衰氣頻  
禁入素標陶詩素標插人頭言白髮也畢竟不如春柳絮踏歌  
聯臂有人招